

# Anwar saksi tiga perjanjian dimeterai

BH - 31/1/2023 m/s: 2

**Kuala Lumpur:** Lawatan rasmi Perdana Menteri, Datuk Seri Anwar Ibrahim ke Singapura semalam, menyaksikan tiga perjanjian dimeterai di antara Putrajaya dan Singapura meliputi aspek ekonomi digital, ekonomi hijau dan keselamatan siber.

Dua rangka kerja melibatkan kerjasama dalam ekonomi digital serta ekonomi hijau ditandatangani Menteri Perdagangan Antarabangsa dan Industri, Tengku Datuk Seri Zafrul Tengku Abdul Aziz dan rakan sejawatnya, Gan Kim Yong bagi pihak Singapura.

Menteri Komunikasi dan Digital, Fahmi Fadzil pula mewakili Malaysia menandatangani memorandum persefahaman (MoU) bagi mempromosi kerjasama dari aspek data, keselamatan siber dan ekonomi digital.

Sebelum ini, Tengku Zafrul berkata, perbincangan dengan Singapura mengenai memorandum kerjasama (MoC) dalam per-

dagangan digital dan ekonomi hijau itu bermula tahun lalu dan telah diberikan kelulusan oleh Kabinet untuk dimuktamadkan tidak lama lagi.

MoC itu adalah susulan rangka kerja kerjasama yang dimuktamadkan oleh kedua-dua negara pada Ogos 2022.

Rangka kerja dalam ekonomi digital akan memudahkan kerjasama dalam bidang seperti pemudahan perdagangan, identiti digital, piawaian, penggalakan pelaburan, pemudahan pendigitalan serta pendigitalan perusahaan mikro, kecil dan sederhana.

Ia bakal membuka peluang serta manfaat kepada perniagaan, pekerja dan rakyat kedua-dua negara.

Dari aspek ekonomi hijau pula, kedua-dua negara akan mengukuhkan kerjasama untuk nyahkarbon industri selain membolehkannya perniagaan dan pekerja merebut peluang yang muncul.